

# Canortas d'uffants – traffic regional – hotellaria

Ier suentermezdi ha cumenzà la sessiun extraordinaria dal cussegl naziunal

■ **(mc) Il cussegl naziunal è sa radunà ier suentermezdi per ina sessiun extraordinaria che cuzza trais dis. La finamira da questa sessiun è da reducir il culm da pendenzas.** Al cumenzament da la sessiun tracta il cussegl naziunal la finanziaziun da canortas d'uffants cun daners federali. Il project è dentant disputaivel. Damai che la tgirra d'uffants è talmain chara renunzian bieras dunnas bain scoladas da la Svizra ad ina lavur professiunala. Il cussegl federal vul midar quest dilemma. Cun subvenziuns statalas vul el reducir ils pretschs per la tgira complementara d'uffants e prender dapli regard dals basegns dals geniturs. Per quest intent propoia il cussegl federal al parlament da conceder in credit liant en la dimensiun da 96,8 milliuns francs sur tschintg onns.

Gia en la sessiun da mars era il cussegl dals chantuns s'exprimì en favur dal project. En il cussegl naziunal èn ils mainis dentant dividids. Entant che la cumissiun da furmaziun sustegn il plan cun ina pitschna majoritad refusa la cumissiun da finanzas il plan. Intgins vulan scursar la summa per la mesadad.

## Daners per il traffic public

La debatta dad oz mesemna è deditgada a la finanziaziun dal traffic da persunas regional. Sin giavisch dals chantuns e da las interpresas da viafier aveva il cussegl dals chantuns decidì en sia sessiun da primavaira d'auzar il credit correspondent per radund 144 milliuns sin passa 4,1 milliardas. Suenter che l'infrastructura naziunala è uss realisada duain uss ils

chantuns e las viafiers privatas avair la pussaivladad da meglierar lur purschida, ha ina majoritad dal cussegl dals chantuns decidì.

La cumissiun da traffic dal cussegl naziunal vul suandar la decisiun dal cussegl dals chantuns. La decisiun è dentant stada fitg filada cun 13 cunter 12 vuschs. La cumissiun da finanzas propoia al cussegl naziunal da suandar la proposta dal cussegl federal. Quel vul metter a disposiziun tranter 2018 e 2021 radund 3,96 milliardas per il traffic regional che inclu-

da tant las lingias da viafier sco quellas dals bus. Quai èn dus pertschient dapli che en la perioda actuala.

## Ultimas differenzas tar la tecnologia genetica

Era per la mesemna è la lescha davart la tecnologia da gens tractandada. Qua èn il cussegl naziunal ed il cussegl dals chantuns sin buna via da chattar ina soluziun. Ils puncts essenzialis han ils cussegls numadamain gia reglà. Il moratori per la tecnologia da gens duai vegnir prolungà per

quatter onns. Reglas per la convivenza da plantas natirales e plantas midadas geneticamain na vul il parlament betg relaschar. Disputaivlas èn era las reglamentaziuns davart la liberalisaziun d'organismes midads tras la tecnologia da gens en la perscrutaziun scientifica.

## Pe da taglia special per la gastronomia

La gievgia vegn il cussegl naziunal a s'occupar dal turissem. Il pe special per la taglia da plivalur d'actualmain 3,8 per-

tschient per la hotellaria duai vegnir francà en la lescha per temp illimità. Ina part da la cumissiun predeliberanta vuless ulletmain prolongir quest pe special.

Tar ils ulteriurs puncts da program tutga la revisiun da la lescha d'agid da valuta. La Svizra duai sa participar vinavant a las mesiras per stabilisar il sistem internaziunal da valuta e finanza. Il cussegl federal vuless prolongir la durada maximala da l'agid da valuta dad oz set sin diesch onns.

## Reducir las pendenzas

Ultra da quai ha il cussegl naziunal da tractar numerusas intervenziuns parlamentaras. Tranter quellas era la moziun ord las retschas da la Partida liberaldemocratica (pld) che pretenda che la confederaziun paja pli ditg per fugitivs e per requisants d'asil recepids transitoricamain.

La Partida populara svizra (pps) vul impedir prevedentamain cun ina iniziativa parlamentara ina eventuala cunvegna instituziunala globala cun l'Uniuin europeica. Represchentants da la Partida socialdemocratica (ps) vulan rinforzar las schanzas en favur dals lavurers ed emploiads pli vegls u scumandar «societads dad Offshore» en Svizra. La Partida burgais-democratica (pbd) pretenda ina obligaziun da votar e d'eleger, la Partida cristiandemocratica (pcd) in register da persunas cun dretg d'assistenza. Ina intervenziun or dal ravugl da la fracziun dals verds pretenda in scumond d'importar trofeas da chatscha. Intginas intervenziuns concernan era la lavur dal parlament. Uschia porta ina il titel «Per garantir debattas parlamentaras efficientas». La sessiun extraordinaria cuzza fin gievgia saira.



Ier suentermezdi è il cussegl naziunal sa radunà per ina sessiun extraordinaria.